

Mid-Day Dogri News

10 Oct. 2025

समां - 12:25 hrs.

JKLA Session

जम्मू-कश्मीर विधानसभा दा शरद रुतै आहला इजलास 23 अक्तूबर शा 31 अक्तूबर तगर श्रीनगर च 9एं दिनें आस्तै लग्गोग। विधानसभा स्पीकर अब्दुल रहीम राथर हुंदे आसेया जारी कीते गेदे आरजी कार्यक्रम मुजब केन्द्र शासित प्रदेश दी विधानसभा दा चौथा इजलास 23 अक्तूबर गी श्रद्धांजलि दे कन्नै शुरु होग ते विदायी कम्मकाज 6एं कम्मकाजें आहले दिनें च चलाया जाग। 24 ते 25 अक्तूबर गी छुट्टियें दी घोषणा कीती गई ऐ। पैहली छुट्टी जम्मू-कश्मीर थमां राज्यसभा दियें चंऊ सीटें लेई-दंऊ बरे च होने आले चुनाएं दे कारण ते दुई छुट्टी- बिजन बैठक दे दिनें दे तौरा पर होग। 26 अक्तूबर गी ऐतवार पौंदा ऐ। 27-30 ते 31 अक्तूबर गी सरकारी कम्मकाज तय कीता गया ऐ जिसलै कि 28 ते 29 अक्तूबर बिलतरतीब निजी सदस्यें दे बिलें ते प्रस्तावें लेई तय कीता गया ऐ।

<><><><><><>

India UN

संयुक्त राष्ट्र महासभा च भारत दे प्रतिनिधिमंडल दी अगुआई करा रदे पी.पी. चौधरी होरें जम्मू-कश्मीर पर पाकिस्तान दे झूठे दावें दा सख्ती कन्नै खंडन करदे होई इस गल्ला दी परतियै पुष्टी कीती ऐ जे जम्मू-कश्मीर भारत दा अभिन्न अंग ऐ। उनें पाकिस्तान उप्पर आरोप लाया जे ओह गलत जानकारी फैलाने ते अपने गैं अंदरुमी मुद्दें थमां ध्यान भटकाने लेई संयुक्त राष्ट्र दे प्लेटफार्म दा गलत इस्तेमाल करा रदा ऐ। चौधरी होरें इस गल्ला पर जोर भरेया जे पाकिस्तान दा इस

मामलें उप्पर कोई Locus Standi नैई ऐ ते उनें वैश्विक समुदाय गी आखेया जे ओ इक बे-
बुनियाद प्रचार उप्पर ध्यान नैई दिंदे होई असली वैश्विक चनौतियें उप्पर ध्यान देन।

<><><><><><>

Itoo WCD Meet

समाज कल्याण मंत्री स्कीना इत्तू होरें मुख भरै च सक्षम आंगनवाड़ी ते पोषण अभियान दे दुए
चरण दी प्रगति दा जायजा लैने लेई केन्द्री महिला ते बाल विकास मंत्री अन्नपूर्णा देवी हुंदी
अगुआई च लोआई गेदी वर्चुअल मीटिंग च हिस्सा लैता। उनें जम्मू-कश्मीर च कल्याणकारी
कार्यक्रमें दी स्थिति बारे केन्द्रीय मंत्री होरें गी जानकारी दिती ते आंगनवाड़ी हैलपरे गी कम्मै पर
रखने लेई योग्यता सरबन्धी अडचने गी खत्म करने जनेह महत्वपूर्ण मुद्दे पर लौ पाई। उनें
कम्मगारें लेई फौरी तौर उप्पर फंड जारी करने- कम्मगारें गी मता मानदेय देने ते केन्द्र आसेया
प्रायोजित स्कीमें गी असरदार तरीके कन्नै लागू करने लेई जम्मू-कश्मीर सरकार गी पूरा समर्थन
दने दी बी गुजारिश कीती।

<><><><><><>

Sports Min Meet

युवा सेवाएं ते खेड्डे दे मंत्री सतीश शर्मा होरें नमीं दिल्ली च केन्द्री खेड्ड मंत्री डॉ. मनसुख
मांडविया हुंदे कन्नै मलाटी करियै जम्मू-कश्मीर च खेड्डे दे बुनियादी ढांचे गी बधाने बारै चर्चा
कीती। शर्मा होरें इक तफसीली ज्ञापन पेश कीता जेहदे च आलमी सतह दिएं खेड्ड सुविधाएं दे
विकास, हर मौसम च सहूलतें कन्नै युक्त जिला स्टेडियम दे आधुनिकीकरण ते पंचैती स्तर पर
खेड्ड सुविधाएं दी स्थापना लेई सहयोग देने दी गुजारिश कीती गेई तां जे ग्रामीण नौजवानें गी

उचित पुज्ज उपलब्ध करोआई जाई सकै। उनें खेलो इंडिया पैहलकदमी तैहत 103 करोड़ 82 लख रपे तौले जारी करने दी बी गुजारिश कीती। शांति, एकता ते एकता गी बढावा देने च खेड्डे दी भूमिका पर जोर दिंदे होई सतीश शर्मा होरें आखेआ जे जम्मू-कश्मीर अपनी खेड्ड यात्रा च इक महत्वपूर्ण मोड़ पर ऐ।

<><><><><><>

CS Milk Production

मुख्य सचिव अटल डुल्लु होरें कृषि उत्पादन मैहकमे दी उच्च स्तरीय बैठक दी अध्यक्षता करदे होई केन्द्र शासत प्रदेश च दुद्ध ते मटन उत्पादन गी बढावा देने लेई चुक्की गेदी गैं दी समीक्षा कीती। मुख्य सचिव होरें इनें सैक्टरें दी तरक्की, मूल्य वृद्धि ते उद्यमिता आस्तै बेहतरीन क्षमताएं गी उजागर कीता। डुल्लु होरें मकामी उद्यमियें गी आखेया जे ओ डेयरी ते पशुधन क्षेत्रें च फैयदा लैन तां जे टिकाऊ आजीविका पैदा कीती जाई सकै ते बधदी मंग गी बी पूरा कीता जाई सकै।

<><><><><><>

TB Free Campaign

डिप्टी कमीशनर उधमपुर सलोनी राय होरें कल सेहत मैहकमे आसेया Model Govt. Hr. Sec. School Boys च आयोजित दो महीने दे तम्बाकू मुक्त अभियान गी शुरु कीता। विद्यार्थियें गी सम्बोधत करदे होई डी.सी. होरें उनेंगी नशे दी कबैतू थमां दूर रौहने ते अनुशासत जीवन जीने लेई आखेया। तम्बाकू दे हानिकारक असर उप्पर लौ पांद होई उनें एह संदेश सांझा कीता जे तम्बाकू गी नां आखना, जिन्दी गी हां आखना ऐ। इस मौके उप्पर नशे विशे उप्पर इक नुक्कड़ नाटक बी प्रस्तुत कीता गया। प्रतिभागियें नशा मुक्ति लेई संगंध बी चुक्की।

DC Jammu Crackers

जम्मू दे डिप्टी कमीशनर डाक्टर राकेश मिन्हास हुंदी अध्यक्षता च औने आहले “देयाली” दे त्योहार लेई तयारियें दा आकलन करने लेई इक समीक्षा बैठक कीती। पटाखे दी बिक्री दी अनुमति गी सुचारु बनाने लेई डी.सी. दफ्तर च इक सिंगल विंडो सिस्टम शुरू कीता गया। अनुमतियां इक विशेष कमेटी आसेया जांच दे बाद पैहले औने आहले, पैहले सेवा दे आधार उप्पर जारी कीतियां जागंन। डाक्टर मिन्हास होरें त्योहार दे जश्न गी खुशहाल बनाने गी यकीनी बनाने उप्पर जोर भरेया ते सब्भन्नैं मैहकमे गी निर्देश दिते जे ओ असरदार ढंगै कन्नै तालमेल बनाने ते त्योहार दौरान कुसा बी चाली दी मदद लेई तयार रौहन।

<><><><><><>